

## सूरदास : poèmes extraits du सूरसागर

राग धनास्त्री

१

जसोदा हरि पालनैं झुलावै ।

हलरावै, दुलराइ मल्हावै, जोइ सोइ कछु गावै ।  
मेरे लाल कौं आउ निंदरिया, काहैं न आनि सुवावै ।  
तू काहें नहिं बेगिहिं आवै, तोकौं कान्ह बुलावै ।  
कबहुँ पलक हरि मूँदि लेत हैं, कबहुँ अधर फरकावै ।  
सोवत जानि मौन ह्वै कै रहि, करि-करि सैन बतावै ।  
इहिं अंतर अकुलाइ उठे हरि, जसुमति मधुरैं गावै ।  
जो सुख सूर अमर-मुनि दुरलभ, सो नँद-भामिनि पावै ॥४३॥

राग बिलावल

२

नान्हरिया गोपाल लाल, तू बेगि बड़ौ किन होहि ।  
इहिं मुख मधुर बचन हँसिकै धौं, जननी कहै कब मोहिं ।  
यह लालसा अधिक मेरे जिय, जो जगदीस कराहिं ।  
मो देखत कान्ह इहिं आँगन पग द्वै धरनि धराहिं ।  
खेलहिं हलधर-संग रंग रुचि, नैन निरखि सुख पाऊँ ।  
छिन-छिन छुधित जानि पय कारन, हँसि-हँसि निकट बुलाऊँ ।  
जाको सिव-बिरंचि सनकादिक, मुनिजन ध्यान न पाव ।  
सूरदास जसुमति ता सुत-हित, मन अभिलाष बढ़ाव ॥६३॥

राग आसावरी

३

घुटुरुनि चलत स्याम मनि-आंगन, मातु-पिता दोउ देखत री ।  
कबहुँक किलकि तात-मुख हेरत, कबहुँ मातु-नुख पेखत री ।  
लटकन लटकत ललित भाल पर, काजर-बिँदु भ्रुव-ऊपर री ।  
यह सोभा नैननि भरि देख, नहिं उपमा तिहुँ भू पर री ।  
कबहुँक दौरि घुटुरुनि लपकत, गिरत उठत पुनि धावै री ।  
इततैं नंद बुलाइ लेत हैं, उततैं जननि बुलावै री ।  
दंपति होड़ करत आपस मैं, स्याम खिलौना कीन्हौ री ।  
सूरदास प्रभु ब्रह्म सनातन, सुत हित करि दोउ लिन्हौ री ॥८६॥

राग रामकली

४

खीझत जात माखन खात ।

अरुन लोचन, भौंह टेढ़ी, बार-बार जँभात ।  
कबहुँ रुनझुन चलत घुटुरुनि, धूरि धूसर गात ।

कबहुँ झुकि कै अलक खैंचत, नैन जल भरि जात ।  
कबहुँ तोतर बोल बोलत, कबहुँ बोलत तात ।  
सूर हरि की निरिखि सोभा, निमिष तजत न मात ॥८८॥

राग आसावरी

५

में देख्यो जसुदा को नंदन खेलत आंगन बारो री ।  
ततछन प्रान पलटि गयो मेरो तन मन ह्वै गयो कारो री ।  
देखत आनि सँच्यो उर अंतर दै पलकनि को तारो री ।  
मोहिं भ्रम भयो सखी उर अपनै चहुं दिसि भयो उज्यारो री ।  
जो गुंजा सम तुलत सुमेरहिं ताहू तें अति भारो री ।  
जैसें बूंद परत बारिधि में त्यों गुन ज्ञान हमारो री ।  
हौं उन मांह कि वै मोहिं महियाँ परत न देह सँभारो री ।  
तरु में बीज कि बीज माहं तरु दुहुं में एक न न्यारो री ।  
जल थल नभ कानन घर भीतर जहं लौं दृष्टि पसारो री ।  
तितहीं तित मेरे नैननि आगे निरतत नंद दुलारो री ।  
तजी लाज कुलकानि लोक की पति गुरुजन प्योसारो री ।  
जिनकी सकुच देहरी दुर्लभ तिनमें मूँड़ उधारो री ।  
टोना टामनि जंत्र मंत्र करि ध्यायो देव दुआरो री ।  
सासु ननद घर घर लिए डोलति याको रोग बिचारो री ।  
कहाँ कहा कछु कहत न आवै औ रस लागत खारो री ।  
इन्हिं स्वाद जो लुब्ध सूर सोइ जानत चाखनहारो री ॥११८॥

राग रामकली

६

मैया कबहिं बढैगी चोटी ।  
किती बार मोहिं दूध पियत भई यह अजहूं है छोटी ।  
तू जो कहति बल की बेनी ज्यों ह्वै लांबी मोटी ।  
काढ़त गुहत न्हावत जैहै नागिन सी भुइं लोटी ।  
काचो दूध पियावति पचि पचि देति न माखन रोटी ।  
सूरदास त्रिभुवन मन मोहन हरि हलधर की चोटी ॥१५२॥

राग रामकली

७

हरि अपनै आंगन कछु गावत ।  
तनक-तनक चरननि सों नाचत, मनहीं मनहीं रिझावत ।  
बाहूँ उठाइ काजरी-धौरी गैयनि टेरि बुलावत ।  
कबहुँक बाबा नंद पुकारत, कबहुँक घर में आवत ।

माखन तनक आपनै कर लै, तनक बदन मै नावत ।  
कबहुँक चितै प्रतिबिंब खंभ में, लोनी लिए खवावत ।  
दुरि देखति जसुमति यह लीला, हरष अनंद बढ़ावत ।  
सूर स्याम के बाल चरित, नित नित ही देखत भावत ॥१५४॥

राग ललित

८

प्रात भयो जागौ गोपाल ।  
नवल सुंदरी आई बोलत तुमहि सबै ब्रजबाल ।  
प्रगत्यौ भानु मंद भयौ उड़पति फूले तरुन तमाल ।  
दरसन कौं टाढ़ी ब्रजवनिता, गूँथि कुसुम बनमाल ।  
मुखहि धोइ सुंदर बलिहारी, करहु कलेऊ लाल ।  
सूरदास प्रभु आनंद के निधि, अंबुज-नैन बिसाल ॥१८१॥

राग गौरी

९

मैया मोहिं दाऊ बहुत खिजायो ।  
मोसों कहत मोल को लीन्हों तू जसुमति कब जायो ।  
कहा करौं इहि रिस के मारें खेलन हौं नहिं जात ।  
पुनि पुनि कहत कौन है माता को है तेरो तात ।  
गोरे नंद जसोदा गोरी तू कत स्यामल गात ।  
चुटकी दै दै ग्वाल नचावत हँसत सबै मुसुकात ।  
तू मोहीं कों मारन सीखी दाउहिं कबहुं न खीझै ।  
मोहन मुख रिस की ये बातें जसुमति सुनि सुनि रीझै ।  
सुनहु कान्ह बलभद्र चबाई जनमत ही को धूत ।  
सूर स्याम मोहिं गोधन की सौं हौं माता तू पूत ॥१८८॥

राग सारंग

१०

जेंवत कान्ह नंद इकठौरे ।  
कछुक खात लपटात दोउ कर बालकेलि अति भोरे ।  
बरा कौर मेलत मुख भीतर, मिरिच दसन टकटौरे ।  
तीछन लगी नैन भरि आए, रोवत बाहर दौरे ।  
फूँकति बदन रोहिनी ठाढ़ी, लिए लगाइ अँकोरे ।  
सूर स्याम कौं मधुर कौर दै कीन्हें तात निहोरे ॥१९७॥

११

मैया मैं नहिं माखन खायो ।

ख्याल परे ये सखा सबै मिलि मेरैं मुख लपटायो ।  
देखि तुही सींके पर भाजन ऊंचे धरि लटकायो ।  
हौं जु कहत नान्हें कर अपनैं मैं कैसें करि पायो ।  
मुख दधि पोंछि बुद्धि इक कीन्हीं दोना पीठि दुरायो ।  
डारि सांठि मुसुकाइ जसोदा स्यामाहि कंठ लगायो ।  
बाल विनोद मोद मन मोह्यो भक्ति प्रताप दिखायो ।  
सूरदास जसुमति को यह सुख सिव बिरंचि नहिं पायो ॥२९९॥

१२

चरावत वृंदावन हरि धेनु ।

ग्वाल सखा सब संग लगाए खेलत हैं करि चैनु ।  
कोउ गावत कोउ मुरलि बजावत कोउ बिषान कोउ बेनु ।  
कोउ निरतत कोउ उघटि तार दै जुरी ब्रज बालक सैनु ।  
त्रिबिध पवन जहं बहत निसादिन सुभग कुंज घन ऐनु ।  
सूर स्याम निज धाम बिसारत आवत यह सुख लेनु ॥४०७॥

१३

बूझत स्याम कौन तू गोरी

कहाँ रहति काकी है बेटी देखी नहीं कहूं ब्रजखोरी ।  
काहे कों हम ब्रजतन आवति खेलति रहति आपनी पौरी ।  
सुनत रहति स्रवननि नँद ढोटा करत फिरत माखन दधि चोरी ।  
तुम्हरो कहा चोरि हम लैहैं खेलन चलौ संग मिलि जोरी ।  
सूरदास प्रभु रसिक सिरोमनि बातनि भुरइ राधिका भोरी ॥४५५॥

१४

देखि सखी मोहन मन चोरत ।

नैन कटाच्छ बिलोकनि मधुरी सुभग भृकुटि बिबि मोरत ।  
चंदन खौरि ललाट स्याम कें निरखत अति सुखदाई ।  
मनौ एक सँग गंग जमुन नभ तिरछी धार बहाई ।  
मलयज भाल भ्रकुटि रेखा की कबि उपमा इक पाई ।  
मानहु अर्द्धचंद्र तट अहिनी सुधा चुरावन आई ।  
भ्रकुटी चारु निरखि ब्रज सुंदरि यह मन करति बिचार ।  
सूरदास प्रभु सोभा सागर कोउ न पावत पार ॥१२४५॥

१५

राधा स्याम की प्यारी ।

कृष्ण पति सर्वदा तेरे तू सदा नारी ।  
सुनत बानी सखी मुख की जिय भयो अनुराग ।  
प्रेम गदगद रोम पुलकित समुझि अपनो भाग ।  
प्रीति परगट कियो चाहै बचन बोलि न जाइ ।  
नंदनंदन दाम नायक रहे नैननि छाड़ ।  
हृदय ते कहुं टरत नाहीं कियो निहचल बास ।  
सूर प्रभु रस भरी राधा दुरत नहीं प्रकास ॥१२७६॥

१६

मुरली भई रहति लड़बौरी ।  
देखति नहीं रैनिहू बासर कैसी लावति ढोरी ।  
कर पर धरी अधर के आगे राखति ग्रीब निहोरी ।  
पूरत नाद स्वाद सुख पावत तान बजावत गौरी ।  
आयसु लिए रहत ताही को डारी सीस ठगौरी ।  
सूर स्याम की बुधि चतुराई लीन्ही सबै अँजोरी ॥२४२७॥

१७

सुनहु सखी याके कुल धर्म ।  
तैसोइ पिता मातु तैसी अब देखौ याके कर्म ।  
वै बरषत धरनी संपूरन सर सरिता अवगाह ।  
चातक सदा निरास रहत है एक बूंद की चाह ।  
धरनी जनम देति सबही को आपुन सदा कुमारी ।  
उपजत फिरि ताही में बिनसत छोह न कहुं महतारी ।  
ता कुल में यह कन्या उपजी याके गुननि सुनाऊं ।  
सूर सुनत सुख होइ तुम्हारै मैं कहिकै सुख पाऊं ॥२४३१॥

१८

मधुबन तुम क्यों रहत हरे ।

बिरह वियोग स्याम सुंदर के ठाढ़े क्यों न जरे ।  
मोहन बेनु बजावत तुम तर साखा टेकि खरे ।  
मोहे थावर अरु जड़ जंगम मुनि जन ध्यान टरे ।  
वह चितबनि तू मन न धरत है फिरि फिरि पुहुप धरै ।  
सूरदास प्रभु बिरह दबानल नख सिख लौं न जरे ॥२८८१॥

१९

निरगुन कौन देस कौ बासी ।

मधुकर कहि समुझाइ सौंह दै, बूझति साँच न हाँसी ।  
को है जनक कौन है जननि, कौन नारि को दासी ।  
कैसो बरन भेष है कैसो, किहि रस में अभिलाषी ।  
पावैगो पुनि कियो आपनौ, जो रे कहैगौ गाँसी ।  
सुनत मौन ह्वै रह्यौ बावरौ, सूर सबै मति नासी ॥३२७९॥

२०

अति मलीन वृषभानकुमारी ।

हरि स्रम जल भीज्यो उर अंचलतिहि लालच न धुवावति सारी ।  
अध मुख रहति अनत नहिं चितवति ज्यों गथ हारे थकित जुवारी ।  
छूटे चिकुर बदन कुम्हिलाने ज्यों नलिनी हिमकर की मारी ।  
हरि सँदेस सुनि सहज मृतक भइ इक बिरहिनि दूजे अलि जारी ।  
सूरदास कैसे करि जीबैं ब्रज बनिता बिन स्याम दुखारी ॥३६८९॥

२१

राधा माधव भेंट भई ।

राधा माधव माधव राधा कीट भृंग गति हवै जु गई ।  
माधव राधा के रँग राँचे राधा माधव रंग रई ।  
माधव राधा प्रीति निरंतर रसना करि सो कहि न गई ।  
बिहँसि कह्यौ हम तुम नहिं अंतर यह कहिकै उन ब्रज पठई ।  
सूरदास प्रभु राधा माधव ब्रज बिहार नित नई नई ॥३८३४॥

२२

अब मैं नाच्यो बहुत गोपाल ।

काम क्रोध कौ पहिरि चोलना, कंठ विषय की माल ।  
महामोह के नूपुर बाजत, निन्दा सब्द रसाल ।  
भ्रम भार्यो मन भयो पखावज, चलत असंगत चाल ।  
तृष्णा नाद करति घट भीतर, नाना बिधि दै ताल ।  
माया को कटि फेंटा बाँध्यौ, लोभ तिलक दियौ भाल ।  
कोटिक कला काछि दिखराई, जल थल सुध नहिं काल ।  
सूरदास की सबै अबिद्या दूरि करौ नंदलाल ॥१४९/३९८७॥